



KENYATAAN MEDIA

KEMENTERIAN EKONOMI
JABATAN PERANGKAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

PERANGKAAN DEMOGRAFI MALAYSIA, SUKU TAHUN KEDUA 2025

BILANGAN KELAHIRAN TERENDAH DIREKODKAN DENGAN 93,435 BAYI LAHIR PADA SUKU TAHUN KEDUA 2025

PUTRAJAYA, 14 OGOS 2025 – Jabatan Perangkaan Malaysia telah mengeluarkan laporan berkaitan Perangkaan Demografi yang memaparkan data kelahiran hidup, kematian dan penduduk bagi suku tahun kedua 2025.

Mengulas laporan tersebut, Ketua Perangkawan Malaysia, Dato' Sri Dr. Mohd Uzir Mahidin menyatakan, "Jumlah kelahiran hidup merekodkan penurunan sebanyak 7.1 peratus kepada 93,435 kelahiran berbanding 100,558 kelahiran pada suku tahun kedua 2024. Bayi lelaki melebihi bayi perempuan dengan 48,444 kelahiran berbanding 44,991 kelahiran. Nisbah jantina bagi kelahiran hidup ialah 108 lelaki bagi setiap 100 perempuan. Selangor merekodkan bilangan kelahiran hidup tertinggi dengan 17,605 kelahiran (18.8%) manakala kelahiran hidup terendah direkodkan di Wilayah Persekutuan Labuan dengan 274 kelahiran (0.3%). Ibu berumur 30-39 tahun mencatatkan kelahiran hidup tertinggi dengan 48,503 kelahiran (51.9%), diikuti oleh ibu berumur 20-29 tahun (40.8%), 40 tahun dan lebih (5.6%) dan kurang daripada 20 tahun (1.6%). Secara purata, seorang bayi dilahirkan pada setiap minit, 43 bayi bagi setiap jam dan 1,027 bayi sehari pada suku tahun kedua 2025".

Dari segi etnik, Melayu menyumbang 68.7 peratus (64,187 kelahiran) daripada jumlah kelahiran hidup pada suku tahun kedua 2025 (ST2 2024: 66,140 kelahiran, 65.8%). Sementara itu, etnik Cina dan India masing-masing turut menurun kepada 8.1 peratus

dan 3.8 peratus berbanding 10.4 peratus dan 4.4 peratus pada suku tahun kedua 2024. Kelahiran hidup bagi Bumiputera Lain meningkat kepada 12.9 peratus berbanding 12.6 peratus pada tempoh yang sama. Bumiputera Lain terdiri daripada Bumiputera Sabah, Bumiputera Sarawak dan Bumiputera Semenanjung Malaysia lain. Bumiputera Sabah menyumbang 58.8 peratus daripada Bumiputera Lain yang terdiri daripada Kadazan/ Dusun (34.7%), Bajau (30.7%), Murut (6.4%) dan Bumiputera Sabah lain (28.2%). Sementara itu, Bumiputera Sarawak merekodkan 34.1 peratus yang terdiri daripada Iban (60.0%), Bidayuh (15.7%), Melanau (11.1%) dan Bumiputera Sarawak lain (13.2%).

Mengulas lanjut, sebanyak 48,408 kematian telah direkodkan pada suku tahun kedua 2025, menurun 3.0 peratus berbanding suku tahun kedua 2024 (49,906 kematian). Bilangan kematian bagi lelaki adalah 27,607 manakala 20,801 kematian bagi perempuan. Nisbah jantina bagi kematian ialah 133 lelaki bagi setiap 100 perempuan. Selangor merekodkan bilangan kematian tertinggi dengan 7,820 kematian (16.2%) manakala Wilayah Persekutuan Labuan merekodkan bilangan kematian terendah dengan 68 kematian (0.1%). Penduduk berumur 60 tahun dan lebih merekodkan bilangan tertinggi dengan 34,165 kematian (70.6%), diikuti 41-59 tahun (20.1%), 15-40 tahun (7.3%) dan 0-14 tahun (2.0%). Terdapat 5.2 peratus kematian bagi penduduk berumur 90 tahun dan lebih. Secara purata, satu kematian direkodkan pada setiap dua minit, manakala 22 kematian direkodkan setiap jam dan 532 kematian sehari pada suku tahun kedua 2025.

Melayu menyumbang 53.1 peratus (25,722 kematian) daripada jumlah kematian (ST2 2024: 26,123 kematian, 52.3%). Kematian bagi Bumiputera Lain menurun kepada 10.5 peratus berbanding 10.7 peratus pada suku tahun kedua 2024. Sementara itu, etnik Cina dan India masing-masing menurun kepada 25.6 peratus dan 8.1 peratus berbanding 25.9 peratus dan 8.2 peratus pada suku tahun kedua 2024. Bumiputera Sabah menyumbang 51.9 peratus daripada Bumiputera Lain yang terdiri daripada Kadazan/ Dusun (38.7%), Bajau (26.2%), Murut (6.5%) dan Bumiputera Sabah lain (28.6%). Sementara itu, Bumiputera Sarawak merekodkan 41.7 peratus yang terdiri daripada Iban (62.1%), Bidayuh (15.2%), Melanau (13.2%) dan Bumiputera Sarawak lain (9.5%).

Ketua Perangkawan Malaysia turut menyatakan, "Seiring dengan penurunan kelahiran pada suku tahun kedua 2025, penduduk Malaysia dianggarkan 34.2 juta berbanding 34.1 juta pada suku tahun kedua 2024 dengan pertumbuhan yang lebih perlahan dengan 0.5 peratus berbanding 1.9 peratus (ST2 2024). Bagi mencapai pertumbuhan penduduk sebanyak 1.1 peratus seperti yang digariskan dalam Rancangan Malaysia Ke-13 (RMK13), Malaysia perlu menambah sekitar 400,000 penduduk setiap tahun."

Komposisi penduduk pada suku tahun kedua terdiri daripada 30.9 juta (90.1%) Warganegara dan 3.4 juta (9.9%) Bukan Warganegara. Penduduk lelaki meningkat kepada 18.0 juta daripada 17.9 juta pada suku tahun kedua 2024 dan penduduk wanita meningkat kepada 16.3 juta daripada 16.2 juta dalam tempoh yang sama. Nisbah jantina keseluruhan penduduk ialah 110 lelaki bagi setiap 100 perempuan manakala nisbah jantina bagi Warganegara ialah 102 lelaki bagi setiap 100 perempuan. Komposisi penduduk tua (65 tahun dan lebih) meningkat daripada 7.6 peratus kepada 8.0 peratus pada suku tahun kedua 2025. Sementara itu, penduduk umur muda (0-14 tahun) merekodkan penurunan daripada 22.2 peratus kepada 21.6 peratus. Penduduk umur bekerja (15-64 tahun) meningkat daripada 70.2 peratus kepada 70.4 peratus bagi tempoh yang sama.

Melayu menyumbang 58.3 peratus daripada jumlah penduduk pada suku tahun kedua 2025 (ST2 2024: 58.1%). Penduduk etnik India dan Bumiputera Lain kekal tidak berubah berbanding suku tahun kedua 2024 iaitu masing-masing pada 6.5 peratus dan 12.2 peratus. Sementara itu, komposisi etnik Cina menurun, mencatatkan 22.2 peratus pada tempoh yang sama. Bumiputera Sabah menyumbang 56.6 peratus daripada Bumiputera Lain yang terdiri daripada Kadazan/ Dusun (31.7%), Bajau (26.5%), Murut (5.1%) dan Bumiputera Sabah lain (36.7%). Sementara itu, Bumiputera Sarawak (32.5%) terdiri daripada Iban (59.1%), Bidayuh (17.1%), Melanau (10.6%) dan Bumiputera Sarawak lain (13.2%).

Ketua Perangkawan Malaysia turut menjelaskan, dunia ketika ini menyaksikan trend penurunan global dalam kadar kelahiran dan kadar kesuburan jumlah (TFR), di mana semakin banyak negara mencatatkan TFR di bawah paras penggantian iaitu 2.1 anak bagi setiap perempuan berumur 15-49 tahun. Fenomena ini menimbulkan cabaran

besar kepada struktur demografi, pertumbuhan ekonomi dan keseimbangan sosial di peringkat global dan negara.

Beberapa negara seperti Republic of Korea, Japan, Singapore, Thailand, China dan Russia telah mengalami penurunan TFR di bawah aras penggantian, yang membawa kepada kebimbangan mengenai penuaan penduduk, penurunan penduduk dan tenaga kerja. Pelbagai dasar berkaitan kependudukan, kesuburan dan sokongan keluarga telah diperkenalkan bagi menangani isu ini. Republic of Korea telah melanjutkan tempoh cuti bersalin kepada tiga bulan, menawarkan cuti penjagaan anak bergaji sehingga setahun, insentif kewangan dan potongan cukai bagi menggalakkan kelahiran. Selain itu, Thailand juga telah melaksanakan insentif dengan meningkatkan pengecualian cukai untuk keluarga yang mempunyai dua atau lebih anak.


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan Open Data Inventory (ODIN) 2024/25 yang dikeluarkan oleh Open Data Watch (ODW), mengatasi 197 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.

Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan'. Sementara itu, Hari Statistik Dunia Keempat akan disambut pada 20 Oktober 2025 dengan tema 'Driving Change with Quality Statistics and Data for Everyone'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


Carta 1: Kelahiran hidup dan kematian (bilangan dan kadar) mengikut suku tahun, 2019-2025^p, Malaysia




Jadual 1: Statistik Demografi bagi suku tahun kedua, 2024 dan 2025, Malaysia

Tahun	Jumlah		Lelaki		Perempuan	
	ST2 2024	ST2 2025	ST2 2024	ST2 2025	ST2 2024	ST2 2025
Penduduk (juta)	34.1	34.2	17.9	18.0	16.2	16.3
Kelahiran hidup	100,558	93,435	51,766	48,444	48,792	44,991
Kematian	49,906	48,408	28,409	27,607	21,497	20,801


Carta 2: Penduduk Warganegara mengikut kumpulan etnik, suku tahun kedua 2024 dan 2025, Malaysia




Carta 3: Kelahiran hidup mengikut kumpulan etnik, suku tahun kedua 2024 dan 2025, Malaysia



Carta 4: Kematian mengikut kumpulan etnik, suku tahun kedua 2024 dan 2025, Malaysia



Carta 5: Transisi Demografi Malaysia, 1911-2023



Dikeluarkan oleh:

**PEJABAT KETUA PERANGKAWAN
JABATAN PERANGKAAN MALAYSIA
14 OGOS 2025**